

# ZAKON O REVIZIJI PRIVATIZACIJE DRŽAVNOG KAPITALA U PRIVREDNIM DRUŠTVIMA I BANKAMA

Službene novine Federacije BiH», broj 55/12 (27.6.2012.)

## 1. Osnovne odredbe

### Član 1.

Ovim zakonom uređuju se predmet, postupak, institucija i sredstva potrebna za provođenje revizije privatizacije državnog kapitala u privrednim društvima i bankama Federacije Bosne i Hercegovine.

### Član 2.

Sa ciljem zaštite prava građana utvrđenih Ustavom Federacije Bosne i Hercegovine državne svojine u procesu privatizacije u Federaciji Bosne i Hercegovine i javnog interesa provest će se revizija privatizacije državnog kapitala u privrednim društvima i bankama koja je izvršena ili se vrši u Federaciji Bosne i Hercegovine. Revizija privatizacije državnog kapitala u privrednim društvima i bankama tretirat će i stvari i prava sa pripadajućim kapitalom privrednih društava (privatiziranih i ne privatiziranih) koja nisu pod kontrolom te nisu bila uključena u aktivni podbilans, a nalaze se na teritoriji država nastalih raspadom bivše Socijalističke Federativne Republike Jugoslavije, potraživanja i obaveze prema pravnim licima iz država nastalih raspadom bivše Socijalističke Federativne Republike Jugoslavije. Revizija privatizacije državnog kapitala u privrednim društvima i bankama uključivat će i raspolaganje novčanim sredstvima ostvarenim prodajom privrednih društava i banaka.

### Član 3.

Pod revizijom (u daljnjem tekstu: revizija) u smislu ovog zakona smatra se naknadni proces ispitivanja i ocjene ispravnosti procesa privatizacije privrednih društava i banaka u Federaciji Bosne i Hercegovine koji obuhvata:

- a) postupke i pismena Vlade Federacije Bosne i Hercegovine, Agencije za privatizaciju, Agencije za bankarstvo, Federalnog ministarstva finansija, Jedinice za privatizaciju banaka, Komisije za vrijednosne papire i Registra vrijednosnih papira, kao i odluke i postupaka drugih organa Federacije Bosne i Hercegovine i kantona,
- b) procedure u pripremi i provedbi privatizacije privrednih društava i banaka,
- c) dokumente (poslovne i knjigovodstvene isprave), poslovne knjige i računovodstvene

iskaze/finansijske izvještaje,

- d) finansijske i računovodstvene transakcije koje se odnose na privatizaciju privrednih društava i banaka,
- e) način raspolaganja novčanim sredstvima ostvarenim prodajom privrednih društava i banaka,
- f) zaključene ugovore o privatizaciji i vjerodostojnu dokumentaciju o izvršavanju ugovorenih obaveza,
- g) identifikaciju stvari, prava, potraživanja i obaveza iz pasivnog podbilansa i način raspolaganja sa njom (stvari i prava sa pripadajućim kapitalom privrednih društava, privatiziranih i neprivatiziranih koja nisu pod kontrolom te nisu bila uključena u aktivni podbilans a nalaze se na teritoriji država nastalih raspadom bivše Socijalističke Federativne Republike Jugoslavije, potraživanja i obaveze nastale do 31.03.1992. godine prema pravnim licima iz država nastalih raspadom bivše Socijalističke Federativne Republike Jugoslavije),
- h) promjenu obavljanja djelatnosti privrednih društava suprotno uvjetima iz ugovora o prodaji,
- i) promjenu imena ili prestanak rada privrednog društva suprotno ugovoru o privatizaciji.

#### Član 4.

Revizija se provodi radi:

- a) utvrđivanja zakonitosti u procesu privatizacije državnog kapitala,
- b) provjere zaključenih ugovora i ispunjavanja obaveza ugovornih strana,
- c) zaštite javnog interesa u procesu privatizacije državnog kapitala,
- d) zaštite stvari i prava sa pripadajućim kapitalom privrednih društava (privatiziranih i neprivatiziranih koja nisu pod kontrolom te nisu bila uključena u aktivni podbilans a nalaze se na teritoriji država nastalih raspadom bivše Socijalističke Federativne Republike Jugoslavije i naplata potraživanja nastalih do 31.03.1992. godine prema pravnim licima iz država nastalih raspadom bivše Socijalističke Federativne Republike Jugoslavije),
- e) sprečavanja nezakonitog raspolaganja novčanim sredstvima ostvarenim prodajom privrednih društava i banaka,
- f) sprečavanja nezakonitog sticanja imovine/imovinske koristi u postupku privatizacije državnog kapitala,
- g) oduzimanja nezakonito stečene imovine/imovinske koristi u postupku privatizacije državnog kapitala,
- h) utvrđivanja odgovornosti odgovornih lica u organima državne uprave, upravnim organizacijama, drugim organizacijama i institucijama Federacije Bosne i Hercegovine i kantona, privrednim društvima i bankama.

#### Član 5.

Revizija privatizacije, prema ovom zakonu, provodi se u privrednim društvima i bankama čiji je državni kapital privatiziran ili se privatizuje u skladu sa odredbama Okvirnog Zakona o privatizaciji preduzeća i banaka u Bosni i Hercegovini ("Službeni

glasnik BiH", br. 14/98, 12/99, 14/00, 16/02 i 88/05), Zakona o privatizaciji preduzeća ("Službene novine Federacije BiH", br. 27/97, 8/99, 32/00, 45/00, 54/00, 27/01, 61/01, 27/02, 33/02, 28/04, 44/04, 42/06 i 4/09), Zakona o privatizaciji banaka ("Službene novine Federacije BiH", br. 12/98, 29/00, 37/01 i 33/02), Zakona o početnom bilansu stanja preduzeća i banaka ("Službene novine Federacije BiH", br. 12/98, 40/99, 47/06, 38/08 i 65/09) i Zakona o vlasničko-pravnim odnosima ("Službene novine Federacije BiH", br. 6/98 i 29/03).

Revizija pretvorbe vlasništva provodit će se i u privrednim društvima gdje je pretvorba izvršena prije donošenja Zakona o privatizaciji preduzeća.

## 1. Institucija za provođenje revizije

### Član 6.

Ovim zakonom osniva se Agencija za reviziju privatizacije u Federaciji Bosne i Hercegovine (u daljnjem tekstu: Agencija za reviziju).

Agencija za reviziju je pravno lice sa sjedištem u Sarajevu.

### Član 7.

Agencija za reviziju provodit će reviziju u skladu sa odredbama ovog zakona i Zakona o reviziji institucija u Federaciji Bosne i Hercegovine ("Službene novine Federacije BiH", br. 22/06).

Ukoliko Agencija za reviziju procjeni da ne može izvršiti reviziju privatizacije privrednih društava i banaka u roku iz člana 14. stav 3. ovog zakona, može u skladu sa Zakonom o javnim nabavkama Bosne i Hercegovine ("Službeni glasnik BiH", br. 49/04, 19/05, 52/05, 92/05, 8/06, 24/06, 70/06, 12/09 i 60/10) privremeno angažirati pravna lica za pružanje usluga revizije, specijalizovane stručne institucije i referentne stručnjake pojedince.

Sa odabranim pravnim licem za pružanje usluga revizije, specijalizovanim stručnim institucijama i stručnjakom pojedincem zaključuje se ugovor.

### Član 8.

Agencija za reviziju u okviru svoje nadležnosti ima javna ovlaštenja za donošenje pojedinačnih upravnih akata u skladu sa Zakonom o upravnom postupku.

### Član 9.

Upravni nadzor nad povjerenim javnim ovlaštenjima iz člana 8. ovog zakona vrši Vlada Federacije Bosne i Hercegovine (u daljnjem tekstu: Vlada Federacije).

U vršenju upravnog nadzora Vlada Federacije rješava po žalbama protiv donesenih upravnih akata u vršenju povjerenih javnih ovlaštenja i vrši i druga prava koja prema zakonu ima drugostepeni organ u upravnom postupku.

Agencija za reviziju dužna je najmanje jedanput godišnje Vladi Federacije podnijeti izvještaj o vršenju povjerenih javnih ovlaštenja.

#### Član 10.

Osnove organizacije i načina poslovanja Agencije za reviziju uređuje Vlada Federacije podzakonskim aktima.

#### Član 11.

Sredstva potrebna za rad Agencije za reviziju osiguravaju se u budžetu Federacije Bosne i Hercegovine.

#### Član 12.

Na zahtjev Agencije za reviziju stručne službe Vlade Federacije i kantona, Agencija za privatizaciju u Federaciji Bosne i Hercegovine, Federalno ministarstvo finansija, Agencija za bankarstvo Federacije Bosne i Hercegovine i svi drugi organi, privredna društva, banke, organizacije i pojedinci dužni su dostaviti podatke, informacije, i dokumentaciju i dati potrebna obrazloženja za potrebe provođenja postupka revizije privatizacije.

#### Član 13.

Agencija za reviziju dužna je svakih šest mjeseci putem Vlade Federacije informirati Parlamentarnu komisiju Federacije Bosne i Hercegovine, Parlament Federacije Bosne i Hercegovine o izvršenim revizijama privatizacije državnog kapitala privrednih društava i banaka u Federaciji Bosne i Hercegovine.

#### Član 14.

Postupak revizije privatizacije pokreće i provodi Agencija za reviziju po službenoj dužnosti u skladu sa godišnjim programom rada. Izvještaj o izvršenju programa rada za prethodnu godinu Agencija je dužna dostaviti Parlamentu Federacije Bosne i Hercegovine najkasnije do 30. marta tekuće godine. Postupak revizije Agencija za reviziju dužna je provesti u svim privrednim društvima i bankama iz člana 5. ovog zakona najkasnije u roku od pet godina od dana stupanja na snagu ovog zakona.

## Član 15.

U postupku revizije Agencija za reviziju utvrdit će:

- a) knjigovodstvenu vrijednost državnog kapitala prema početnom bilansu stanja privrednih društava i banaka,
- b) promjene nastale na kapitalu kao i druge materijalno značajne promjene na imovini i obavezama od dana utvrđivanja početnog bilansa stanja do dana privatizacije i od dana privatizacije do dana završetka revizije,
- c) vrijednost i način raspolaganja imovinom iz pasivnog podbilansa od privrednog društva i drugih subjekata,
- d) ispunjavanje ugovornih obaveza od kupca definiranih ugovorom o prodaji državnog kapitala,
- e) da li su od dana pokretanja do okončanja procesa privatizacije aktivnosti nadležnih nosilaca procesa privatizacije i kupca bile u skladu sa važećim propisima.

### 1. Radnje, mjere i postupci prema izvršenoj reviziji

## Član 16.

Agencija za reviziju nakon provedenog postupka i na osnovu utvrđenih činjenica i prikupljenih dokaza u procesu revizije, a prije završetka konačnog revizorskog izvještaja, priprema nacrt izvještaja o reviziji koji dostavlja upravi privrednog društva ili banke na komentar.

Komentar uprave privrednog društva ili banke na nacrt izvještaja o reviziji iz stava 1. ovog člana dostavlja se Agenciji za reviziju u roku od 15 dana po prijemu nacrta izvještaja ili u dužem roku o kojem odlučuje Agencija za reviziju.

Agencija za reviziju dužna je razmotriti komentare uprave privrednog društva, banke ili rukovodioca organa, organizacije i institucije, odnosno prije pripreme konačnog izvještaja i u slučajevima neslaganja - u konačni izvještaj uključiti njihove relevantne komentare i dati revizorsko mišljenje o provedenoj reviziji privatizacije privrednih društava i banaka.

## Član 17.

Nakon provedenog postupka revizije privatizacije privrednih društava i banaka Agencija za reviziju donosi rješenje kojim se utvrđuje da je privatizacija provedena u skladu sa zakonom i drugim propisima ili da je u toku privatizacije došlo do povrede propisa.

Sastavni dio rješenja iz stava 1. ovog člana čini konačni izvještaj o izvršenoj reviziji sa revizorskim mišljenjem.

Rješenje iz stava 1. ovog člana dostavlja se pravnom licu kod kojeg je izvršena revizija, Agenciji za privatizaciju u Federaciji Bosne i Hercegovine, Federalnom ministarstvu finansija i Agenciji za bankarstvo ukoliko je vršena revizija banke i nadležnom ministarstvu, odnosno

organu koji je u banci ili privrednom društvu u kojem je izvršena revizija vršio ovlaštenja na osnovu državnog kapitala u vrijeme pokretanja postupka privatizacije, koji protiv rješenja mogu izjaviti žalbu u roku od 15 dana od dana dostavljanja.

O žalbi iz stava 3. ovog člana koja se dostavlja putem Agencije za reviziju, rješava Vlada Federacije.

#### Član 18.

Ukoliko je rješenjem iz člana 17. stav 1. ovog zakona utvrđena povreda zakona, Agencija za reviziju će u skladu sa svojim ovlaštenjima, odredbama Zakona o upravnom postupku ("Službene novine Federacije BiH", br. 2/98 i 48/99) i Zakona o obligacionim odnosima ("Službeni list SFRJ", br. 29/78, 39/85, 45/89, 57/89 i "Službeni list R BiH", br. 2/92, 13/93, 13/94 i 29/03), bez odlaganja pokretati upravne postupke, upravne i parnične sporove radi izmjene, poništenja ili ukidanja rješenja i zaključenih ugovora o privatizaciji državnog kapitala privrednih društava i banaka, privremenom osiguranju nezakonito stečene imovine/imovinske koristi i povratu, odnosno oduzimanju nezakonito stečene imovine/imovinske koristi.

U postupcima iz stava 1. ovog člana zaštitu državnog kapitala koji je privatiziran vrše nadležna pravobranilaštva.

Nezakonito stečena imovina/imovinska korist koja bude oduzeta pravomoćnom presudom suda predaje se na upravljanje Vladi Federacije. O načinu upravljanja oduzetom imovinom/imovinskom koristi Vlada Federacije donijet će uputstvo u roku od 30 dana od dana stupanja na snagu ovog zakona.

#### Član 19.

Ako Agencija za reviziju u konačnom izvještaju i datom revizorskom mišljenju utvrdi postojanje radnji koje imaju obilježje prekršaja, podnijet će prijavu i uz konačan izvještaj i revizorsko mišljenje sa vjerodostojnom dokumentacijom istu dostaviti nadležnom sudu na daljnji postupak.

Ako Agencija za reviziju u konačnom izvještaju i datom revizorskom mišljenju utvrdi postojanje radnji koje imaju obilježje krivičnog djela, podnijet će konačan izvještaj i revizorsko mišljenje sa vjerodostojnom dokumentacijom nadležnom tužilaštvu na daljnji postupak.

##### 1. Kaznene odredbe

#### Član 20.

Novčanom kaznom u iznosu od 500,00 KM do 3.000,00 KM bit će kažnjeno za prekršaj odgovorno lice u organu državne uprave i odgovorno lice u pravnom licu (privredno društvo ili banka) ukoliko ne postupe prema zahtjevu Agencije za reviziju (član 12. ovog zakona). Novčanom kaznom u iznosu od 1.000,00 KM do 15.000,00 KM bit će kažnjen za prekršaj

organ državne uprave i pravno lice ukoliko ne postupe prema zahtjevu Agencije za reviziju (član 12. ovog zakona).

## 1. Prijelazne i završne odredbe

### Član 21.

U postupku revizije privatizacije privrednih društava i banaka prema ovom zakonu primjenjuju se odgovarajuće odredbe Zakona o upravnom postupku. Pokrenuti postupci kontrole zaključenih ugovora o privatizaciji privrednih društava i ispunjavanja ugovornih obaveza, a koji nisu okončani do dana stupanja na snagu ovog zakona, završit će se prema odredbama zakona po kojem su pokrenuti.

### Član 22.

Ovaj zakon stupa na snagu osmog dana od dana objavljivanja u "Službenim novinama Federacije BiH".

Predsjedavajuća  
Doma naroda  
Parlamenta Federacije BiH

Karolina Pavlović

Predsjedavajući  
Predstavničkog doma  
Parlamenta Federacije BiH

Dr. Denis Zvizdić